



Skeudenn : Erwan Le Seure Bihan

TESTENN 3/5

Lennet get **Ronan L'hourre**

Da selaou àr
www.tidouaralre.com

6 a vezheven

An avel a zigresk tamm-ha-tamm, ken na santer mui an disterañ c’hwezhadenn. Al lien a gouezh evel marv. Diwar hiziv ne vo mui roet nemet an hanter eus al lodenn dour a veze roet da bep den. Bremaik e oan astennet war va gwele, o soñjal e feunteunioù fresk hor bro, en dour yen o redek dindan ar reier, a-dreuz d’ar geot glas hag e skeud ar c’hoadoù. Ma rankomp gouzañv diouzh ar sec’hed, en em c’houlennin adarre petra on deut da glask amañ, perak n’ou ket chomet er gêr, perak ez eus tud evel don a dle tec’hout atav diouzh an eürusted.

17 a vezheven

Anzav a rankan, mignonez, e sellan alies ouzh ar mor. A-wechoù n’eo nemet ur sell. A wechoù, pa ‘m eus amzer, e choman e-pad un hanter eur, en noz pe en deiz. N’eo ket, Adela, evit he gwelout ; er c’hontrol, evit bezañ sur n’emañ ket aze ; evit dont da grediñ tamm-ha-tamm n’eus ket anezhi.

Sellout a ran ouzh ar mor, evel dre laer. Ne fell ket din e teufe den da zivinout ma menozhioù. An holl ofiserien a oar bremañ istor an daou vartolod o deus klasket pakañ ur vari-vorgan. Darn o deus c’hoarzhed – Arzhur en deus graet an neuz da gaout plijadur ivez –,

met ne gomzont ket diwar-benn se kement ha m'em bije soñjet. Kriz eo va stad. C'hoant am eus klevout, ha ne c'hellan goulenn netra, hag e rankan ober zoken evel pa ne selaoufen ket.

Sur on ez eus re all evel don. Meur a hini a sell ouzh ar mor ivez, e kuzh. Iskis e kavan daoulagad an dud. Iskis e kavan o doareoù. Ar galloud fall, a lavarfed, an hini a rae aon d'ar c'habiten, oc'h astenn war an *Agenor* e roued vurzhdus.

Dec'h da noz, edo Arzhur war ar pont, e-unan-penn, difiñv, evel beuzet en e soñjoù. Stumm e gorf a welen, treset e du war an oabl steredek. N'em gwele ket. Ur pennad mat omp chomet e-giz-se, ne ouzon tamm pegeit. Pa'z eo aet kuit, on chomet c'hoazh ur pennad hir el lec'h ma edon, ne ouzon ket perak.

18 a vezheven

Lennet hoc'h eus koulz ha me ez eus bet kavet listri o vont war vor, den ebet enno ken; netra o tiskouez dre beseurt abeg e oant bet dilezet ; pep tra en urzh, hep ur baperenn, hep an disterañ tamm lizher da ziskleriañ pezh a oa tremenet.

Ma c'hoarvezfe heñvel get an *Agenor* henozh, hag a-walc'h e vefe digeriñ ar c'haier-mañ da gompren ?

Tennet a **Mari-Vorgan**, get Rorparz Hemon.
Al Liamm, 1975